

河南通志

河南通志卷之五十三

帝王

帝王統馭方夏河南志一省事也何以書從其建都者書之也志之爲體列都邑表風俗紀名卿賢士大夫粲然備矣矧王畿肇建都邑之所由廢興風俗之所由升降士大夫之所由黜陟進退而可無紀歟又况自太皞以來先聖前民致用其遺風餘烈猶有可追者歟至如后妃宣理陰教修成內治亦王化之所關也爰考列史其事迹不具載載其歷年之久近與后妃冊封之年月著之篇令後得緣是以考諸史焉

志帝王及后妃

〔古〕太皞庖犧氏風姓代燧人氏繼天而王母曰華胥履

巨人跡於雷澤而生庖犧於成紀有聖德仰則觀象

於天俯則觀法於地旁觀鳥獸之文與地之宜近取

諸身遠取諸物始畫八卦以通神明之德以類萬物

之情造書契以代結繩之政於是始制嫁娶以儷皮

爲禮結網罟以教佃漁養禽獸以供犧牲故曰庖犧

又曰虞義氏有龍瑞以龍紀官號曰龍師作二十七

絃之琴以木德王都於陳在位一百一十五年

朱襄氏自庖犧氏後歷十一氏而至朱襄氏都柘城

其時恒風振蕩果木不實朱襄命士達作五絃之瑟

以來陰氣定羣生而天下治又曰子襄氏

炎帝神農氏姜姓母曰女登有媯氏之女爲少典妃
感神龍而生炎帝長于姜水因以爲姓以火德王故
曰炎帝以火名官斲木爲耜揉木爲耒耜耨之川以
教天下故號神農氏於是作蜡祭嘗百草始有醫藥
又作五絃之琴教人日中爲市交易而退各得其所
遂重八卦爲六十四卦初都陳後居曲阜在位一百
二十年

黃帝有熊氏少典之子姓公孫名曰軒轅生而神靈
弱而能言幼而徇齊長而敦敏成而聰明時諸侯相
侵伐暴虐百姓帝乃習用干戈以征不享諸侯咸來
賓從而蚩尤爲暴莫能伐帝乃徵師諸侯與蚩尤戰

於涿鹿之野遂禽殺之諸侯尊帝爲天子伐神農氏
王天下有不順者從而征之未嘗寧居東至於海西
至於崆峒南至於江北逐葷粥邑於涿鹿之阿遷徙
無常以兵師爲營衛以雲紀官舉風后力牧常先大
鴻以治民時播百穀草木淳化鳥獸蟲蛾旁羅日月
星辰水波土石金玉勞勤心力耳目節用水火財物
有土德之瑞故號曰黃帝生二十五子其得姓者十
四人都於軒轅之邱在位百年 按一統志軒轅邱
在開封府新鄭縣

帝嚳高辛氏姓姬名姒黃帝曾孫祖曰元囂父曰蟠
極帝生而神靈自言其名普施利物不於其身聰以

知遠明以察微順天之義知民之急仁而威惠而信
取地之財而節用之撫教萬民而利誨之歷日月而
迎送之明鬼神而敬事之其色郁郁其德嶷嶷其動
也時其服也士帝嚳既執中而徧天下日月所照風
雨所至莫不服從以木德王都於亳在位七十年壽
五百歲 按一統志亳今偃師縣

夏神禹姓姁氏黃帝之元孫鯀之子當帝堯時洪水滔
天鯀治水無功於是舜舉禹使續鯀業禹既受命傷
父功不成乃勞身焦思居外十三年三過其門而不
入陸行乘車水行乘船泥行乘橈山行乘櫟以開九
州通九道陂九澤度九山乃相土田草木之宜以作

其賦東漸於海西被流沙朔南暨聲教訖於四海於是錫元圭告成功於天下及舜爲天子復代舜典百揆十有七年而舜命以位禹辭避於陽城弗獲乃以正月朔旦受命于神宗率百官若帝之初國號曰夏在位三十七年壽一百歲 按括地志陽城在今登封縣

帝啓禹之子克遵父業饗諸侯於鈞臺時有扈氏不服啓召六師以征之大戰於甘作甘誓而有扈氏遂滅在位九年 按括地志鈞臺卽今禹州

太康啓之子荒逸弗恤國事畋於洛水之表十旬弗反有窮后羿因民弗忍距於河弗獲歸國遂都陽夏

厥弟五人御其母以從襁於洛汭作歌以怨之在位二十九年 按括地志陽夏卽今太康縣

仲康太康弟嗣天子位卽命侯掌六師以征羲和在位五年

帝相仲康之子旣立爲羿所逐依同姓諸侯斟灌斟鄩氏徙居商邱後爲寒浞所害在位二十七年

商成湯姓子氏名履契之後主癸之子湯旣卽位自商邱徙都於亳任伊尹以國政時夏桀爲虐湯修德而諸侯咸服遂興弔伐之師放桀於南巢乃踐天子位國號曰商在位十三年壽百歲 按括地志宋州穀熟縣西南三十五里有南亳故城卽湯都也

太甲湯嫡孫太子太丁子既立不惠於阿衡伊尹乃放之桐宮三年悔過自責反善伊尹乃復連歸而授之政太甲修德諸侯咸歸故稱太宗在位三十三年沃丁太甲子既卽位伊尹卒乃委任賢臣咎單遂訓伊尹事作沃丁在位二十九年

太庚沃丁弟在位二十五年

小甲太庚子在位十八年

雍已小甲弟在位十三年

太戊雍已弟既立用伊陟爲相

桑穀共生於

朝一暮大拱太戊懼問伊陟對曰臣聞妖不勝德帝之政其有闕乎帝其修德太戊從之而祥桑枯死殷

道復興諸侯歸之故稱中宗在位七十六年墓在
今內黃縣西南

仲丁太戊子既立亳都有河決之害乃自亳遷於囂
在位十有三年按括地志鄭州滎澤縣西南十七
里卽囂地也

外壬仲丁弟在位五年

河亶甲外壬弟時囂都又河決乃遷於相在位十年
相今內黃地有亳城

盤庚帝陽甲弟既立而耿都復有河決之害乃自耿
渡河南遷都於亳復居成湯故都因殷民之重遷作
書告諭而百姓始甯修湯之政殷道復興在位二十

二年

小辛盤庚弟在位二十二年

小乙小辛弟在位二十八年

武丁小乙子卽位恭默思道夢上帝賚以良弼乃使人以形旁求於天下得說於傅巖中舉以爲相殷國大治在位五十九年

祖庚武丁子在位十七年

祖甲祖庚弟在位十七年

廩辛祖甲子在位六年

庚丁廩辛弟在位二十一年

武乙庚丁子旣立復三年徙河北在位四年 按河

北卽相州州有故殷城屬彰德府疑卽亳城

太丁武乙子在位四年

帝乙太丁子在位三十八年

受辛帝乙子卽紂暴戾荒淫百姓怨讟於是周武王率諸侯伐紂陳師牧野紂兵倒戈入鹿臺衣其寶玉赴火而死周武王既有天下封其子武庚祿父以續殷祀而殷遂亡按牧野衛地今衛輝府

周成王名誦后稷之後文王孫武王子初武王都鎬欲營洛而未果至是成王乃命周公成武王之意卜澗水東瀍水西爲王城而定鼎於郊廓是爲成周以朝會諸侯在位三十七年按一統志郊廓卽今河南

府洛陽縣

平王名宜臼幽王子武王十二世孫自鎬京東遷雒邑是爲東周在位五十一年

桓王名林平王孫父洩未立而卒桓王嗣在位二十三年

莊王名佗桓王子在位十五年

釐王名胡齊莊王子在位五年

惠王名闔釐王子初莊王嬖姬姚生子頹有寵及惠王卽位奪其大臣圍以爲圉故大夫邊伯等五人作亂謀召燕衛之師以伐惠王惠王犇溫立頹爲王樂及徧舞鄭虢君怒伐殺頹復入惠王在位二十五年

按地理志溫河內溫縣

襄王名鄭惠王子母早死後母曰惠后生子叔帶有寵於惠王欲立而不克帶與戎狄謀伐襄王襄王知之欲誅帶帶奔齊後狄人奉帶入周伐襄王襄王出奔鄭鄭居王於汜狄人因立帶爲王襄王告急於晉晉文公納襄王而誅叔帶奉襄王歸周襄王乃賜晉文公珪鬯弓矢爲伯以河內地與晉晉復召襄王會於河陽踐土在位三十三年 按地里志汜隸鄭州河陽踐土俱屬懷慶府

頃王名壬臣襄王子在位六年

匡王名班頃王子在位六年

定王名瑜匡王弟元年楚子伐陸渾觀兵於周郊問
九鼎輕重王使王孫滿勞之楚兵乃去在位二十

年 按地里志陸渾卽令嵩縣

簡王名夷定王子在位十四年

靈王名泄簡王子在位二十七年

景王名貴靈王子在位二十五年

悼王名猛景王子在位七月爲王子朝所弑

敬王名匄景王子猛之母弟晉人逐子朝立之在位

四十四年 按括地志故王城本郊鄆周公所築在

洛州河南縣西九里自平王以下十二王皆都此城

敬王遷都成周至赧王又居王城

元王名仁敬王子在位八年

貞定王名介元王子在位二十八年

哀王名去疾定王子在位三月爲弟叔襲所弑

思王卽叔襲在位五月爲弟嵬攻所弑

考王卽嵬攻在位十五年

威烈王名午考王子二十三年九鼎震命韓魏趙爲
諸侯在位二十四年

安王名驕威烈王子在位二十六年

烈王名熹安王子在位十年

顯王名扁烈王弟在位四十八年

慎靚王名定顯王子在位六年

赧王名延慎觀王子在位五十九年爲秦所攻王奔秦盡獻其邑三十六秦受之歸其君於周是歲王崩周遂亡

東漢世祖光武皇帝姓劉名秀南陽蔡陽人高祖九世孫南頓令欽之子初欽爲濟陽令以建平元年十二月甲子夜生帝於縣舍有赤光照室卜者王長占之曰此兆吉不可言是歲縣界有嘉禾生一莖九穗因名曰秀及長會王莽篡位天鳳末帝避吏新野因賣穀於宛宛人李通以圖讖說之初不敢當然念天下方亂王莽敗亡已兆遂與定謀市兵弩與通從弟軼等起於宛於時海內之士翕然響應乃徇昆陽定陵